

四庫全書

經部

欽定四庫全書

樂書卷一百

宋 陳旸 撰

樂圖論

十二律

總論
旋宮

總論

萬物孳萌於子紐牙於丑引達於寅冒萌於卯振美於辰巳

盛於巳罍布於午昧夢於未申堅於申留熟於酉畢入於戌
闕該於亥故建子之律陽氣鍾於黃泉謂之黃鍾其日壬癸
其月為辜其歲困敦其風廣莫其宿虛其次須女其辰合星
紀其候冬至在卦則乾之初九也故合於大呂而下生林鍾
焉建丑之律陰氣旅助於陽謂之大呂其月為涂其歲赤奮
其宿牽牛其次建星其辰合元枵其候大寒其卦則坤之六
四也故合於黃鍾而下生夷則焉建寅之律萬物湊地而出
謂之太族其月為陬其歲攝提其風條其宿箕其次尾其

辰合娵訾其候啓蟄在卦則乾之九二也故合於應鍾而
下生南呂焉建卯之律陰陽之氣相夾而聚謂之夾鍾其
日甲乙其月為如其歲單闕其風明庶其宿心其次房其
辰合降婁其候春分在卦則坤之六五也故合於無射而
下生焉建辰之律萬物且然絜齊謂之姑洗其月為寗
其歲執徐其宿底其次亢其辰合大梁其候清明在卦
則乾之九三也故合於南呂而下生應鍾焉建巳之律
萬物盡旅而西行謂之仲呂其月為余其歲荒落其風

清明其宿軫其次翼其次合實沈其候小滿在卦則坤之上六也故合於夷則而上生黃鍾焉建午之律陰繼於陽而賓之謂之蕤賓其日丙丁其月為臯其歲敦牂其風景其宿張其次星紀其辰合鶉首其候夏至在卦則乾之九四也故合於林鍾而上生大呂焉建未之律萬物成熟而衆多為之函鍾其日戊己其月為且其歲協洽其宿孤其次狼其辰合鶉火其候大暑在卦則坤之初六也故合於蕤賓而上生太族焉建申之律萬物

夷易各有儀則謂之夷則其月為相其歲涖灘其風涼
其宿伐其次參其辰合鶉尾其候處暑在卦則乾之九
五也故合於小呂而上生夾鍾焉建酉之律南氣旋入
謂之南呂其日庚辛其月為壯其歲作噩其風闐闐其
宿囓其次留其辰合壽星其候秋分在卦之坤之六二
也故合於姑洗而上生焉建戌之律陽氣無餘謂之無
射其月為玄其歲闔茂其宿胃其次奎其辰合大火其
候霜降在卦則乾之上九也故合於夾鍾而上生仲呂

焉建亥之律陰陽交應謂之應鍾其月為陽其歲大淵
其風不周其宿壁其次室危其辰合析木其候小雪在
卦則坤之六三也故合於太族而上生蕤賓焉由是觀
之本乎乾爻者為六律本乎坤爻者為六同六律左旋
而生同為同位所以象夫婦六呂有轉而生律為異位
所以象子母間八而生所以象八卦旋之為宮所以象
三才文之以聲不過乎五播之以音不過乎八成之以
舞不過乎六要之一會歸中聲而已大司樂以是大合

樂則幽明內外遠近微顯無往不通豈非樂通倫理之效耶然陽盡變以造始故每律異名陰體常以效法故止於三鍾三呂而已則鍾物所聚也呂物所匹也夾鍾亦謂之圜鍾以春主規言之函鍾亦謂之林鍾以夏主庇物言之南呂亦謂之南事則陰之所成者事而已中呂亦謂之小呂則陰之始萌者小而已六律謂之六始其位始乎陰也六呂謂之六間其位間乎陽也亦謂之六同其情同乎陽也分而言之則然合而論之皆述陽

氣而上下通焉此所以均謂之十二律也月令十二月
皆言律中者謂應中氣而中律故也中央特言律中黃
鍾之宮者蓋四時本於中央十二律本於黃鍾五聲本
於宮八音本於土以中央無正律而中聲出焉故取黃
鍾之宮為聲律之本考工記量中黃鍾之宮亦此意歟

原缺

十二律旋宮

祀天神

圜鍾宮

黃鍾角

太簇徵

姑洗羽

函鍾宮

太簇角

姑洗徵

南呂羽

祭地祇

黃鍾宮

大呂角

享人鬼

太簇徵

應鍾羽

天五地六天地之中合也故律不過六而聲亦不過五其相旋為宮又不過三以備中聲而已蓋天以圓覆為體其宮之鍾不謂之夾而謂之圜與易乾為圜同意以其為帝所出之方也地以含容為德其宮之鍾不謂之

林而謂之函與易坤含宏同意以其為萬物致養之方也人位天地之中以成能其宮之鍾稱黃與易黃中通理同意以其為死者所首之方也且樂以中聲為本而倡和清濁迭相為經故以仲春之管為天宮仲冬之管為人宮中央長夏之管為地宮國語有四宮之說不亦妄乎今夫五聲旋相之法圜鍾之呂為宮無射之律為之合黃鍾之律為角大呂之呂為之合太簇之律為徵應鍾之呂為之合姑洗之律為羽南呂之呂為之合凡

此宮之旋而在天者也故其合別而有四函鍾之呂為
宮蕤賓之律為之合太簇之律為角應鍾之羽為之合
姑洗之律為徵南呂之呂為羽而交相合焉凡此宮之
旋而在地者也故其合降而為三黃鍾之律為宮大呂
之呂為角太簇之律為徵應鍾之呂為羽而兩相合焉
凡此宮之旋而在人者也故其合又降而為二在易上
經言天地之道下經言人道而元亨利貞之德乾別為
四坤降為二咸又降為一亦此意也蓋一陰一陽之謂

道天法道其數參而奇雖主乎三陽未嘗不以一陰成之故其律先陰而後陽地法天其數兩而偶雖主乎二陰未嘗不以二陽配之故其律或上同於天而以陰先陽或下同於人而以陽先陰人法地則以同而異此其律所以一於陽先於陰乎大抵旋宮之制與易著卦六爻之數常相為表裏著卦之數分而為二以象兩儀掛一以象三才揲之以四以象四時歸奇於扚以象閏而六爻之用抑又分陰分陽迭用柔剛則知陰陽之律分

而為二亦象兩儀之意也其宮則三亦象三才之意也

其聲則四亦象四時之意也餘律歸奇亦象閏之意也

分樂之序則奏樂歌呂亦分陰分陽之意也三宮之用

則三木迭旋亦迭用柔剛之意也十有二律之管禮天

神以圜鍾為首禮地祇以函鍾為首禮人鬼以黃鍾為

首三者旋

闕

羽之管亦隨而運焉如此

則尊卑有

闕

之位取三統三正之義

亦不過

闕

曰五聲六律十二管旋相

為宮如此

闕

有二律均旋為宮又附益之

以變宮變

闕

之準不亦失聖人取中聲寓

尊卑之意耶

闕

黃鍾為宮為羽

大呂為二商太

闕

為徵為羽姑洗為宮

為羽中呂為宮

闕

鍾為徵為羽夷

則為羽為角

闕

為商應鍾為角

為羽抑又其

闕

為徵者祀天於

南郊而以祖

闕

宮不用商聲者

欽定四庫全書



樂書
卷一百

八

商為金聲而周以

闕

所尅而已太師

掌六律六同以合

闕

之以五聲宮商角徵

羽則古樂之聲闕一不

闕

非不備五聲其無

商者文去而實不去

闕

詩商為太師之職

然則詩為樂章商為

闕

商聲太師必審之者

為避所尅

闕

角右宮羽亦不用商

同

闕

哉先儒言天宮不用

中

闕

南呂姑洗蕤賓不用

闕

之宮不用人宮之

闕

鍾孰謂避天地之

闕

聲餘五律啞而

闕

闕

取法於編鐘宮架旋相為宮八十四

調自夷則以下四均用清聲啞鐘復鳴凡考擊之法面

北下八自右手向西擊黃鍾正

第二大呂正第三太簇正四夾鍾正五姑洗正

六仲呂正七蕤賓正八自左手向東擊夷則正

次南呂正次無射正

次應鍾正餘並倣此

十二正律既具次設清聲四枚在應鍾之次參以諸器皆有清濁相應可謂善矣然皇帝親行祫享之禮迎神宮架奏興安九成之曲黃鍾為宮三奏大呂為角二奏太簇為徵二奏應鍾為羽二奏音不去羽而去商律不用十二而用十六臣恐未合先王之制也

樂書卷一百

欽定四庫全書

樂書卷一百一

宋 陳旴 撰

樂圖論

十二律

律呂相生上


律呂相生中

律呂相生下

律呂子聲

辨四清

律呂相生上

			六月林鍾	五月蕤賓	四月仲呂
					
			七月夷則	八月南呂	九月無射
			十月應鍾	十一月黃鍾	十二月大呂
			正月太簇	二月夾鍾	三月姑洗

甚哉諸儒之論律呂何其紛紛耶謂陰陽相生自黃鍾始而左旋八八為伍管以九寸為法者班固之說也下生倍實上生四實皆三其法而管又不專以九寸為法者司馬遷之說也持隔九相生之說以中呂上生黃鍾不滿九寸謂之執始下生去減上下相生終於南事十二律之外更增六八為六十律者京房之說也本呂覽淮南王安蔡邕之說建蕤賓重上生之議至於大呂夾鍾仲呂之律所生分等又皆倍焉者鄭康成之說也隔

七為上生隔八為下生至於仲呂則孤而不偶蕤賓則
踰次無準者劉向之說也演京房南事之餘而伸之為
三百六十律日當一管各以次從者宋錢樂之之說也
斥京房之說而以新舊法分度參錄之者何承天沈約
之說也校定黃鍾每律減三分而以七寸為法者隋劉
焯之論也析毫釐之強弱為算者梁武帝之法也由此
觀之諸儒之論角立蠡起要之最為精密者班固之志
而已今夫陰陽之聲上生者三分之外益一下生者三

分之內損一蓋古人簡易之法猶古歷周天三百六十五度四分度之一也若夫律同之聲適多寡之數長短之度小大之量清濁之音一要宿乎中聲而止則動黃鍾而林鍾應動無射而仲呂應和樂未有不興者矣

律呂相生中

度之本在身律之本在聲故凡聲律之用陽或損數以生陰於下陰或益數以生陽於上故黃鍾之管九寸因九而九之為得八百一十分當歷之一統所以全參天

之數而為六陽始也三分損一而林鍾生焉林鍾之管

六寸因六而六之為得三百六十分當期之日所以全

兩地之數而為六陰始也三分益一而太簇生焉

黃鍾九寸

之管分作三分每分合有三寸除其三寸自然合成六月林鍾六寸之管謂之下生林鍾六寸之管分作三分

每分合有二寸率此之數加之六寸之上自然合成六正月太簇八寸之管謂之上生餘律之管准此

太簇

之管八寸因八而八之為得六百四十分當六十四卦

所以全五位之合極天地之變也三分損一而南呂生

焉南呂之管五寸三分寸之一三分益一而姑洗生焉

姑洗之律七寸九分寸之一三分損一而應鍾生焉應
鍾之管四寸二十七分寸之二三分益一而蕤賓生焉
蕤賓之管六寸八十一分寸之二十六三分損一而大
呂生焉大呂之管八寸二百四十三分寸之一百四三
分益一而夷則生焉夷則之管五寸七寸二十九分寸
之四百五十一三分損一而夾鍾生焉夾鍾之管七寸
二千一百八十七分寸之千七十五三分益一而無射
生焉無射之管四寸六寸五寸六十一分寸之六千五

百二十四三分損一而中呂生焉中呂之管六寸一萬
九千六百八十三分寸之萬二千九百七十四凡此十
二律相生之位終於仲呂復生黃鍾自黃鍾左旋八八
為伍隔八辰而相生自然子午以東為上以西為下下
生者倍其實三其法而聽之為易知上生者四其實三
其法而聽之為難知此所以明陽下生陰陰上生陽也
然十二月聲陰陽常定音既清濁不一管自長短不常
聲濁則管長聲清則管短排而視之義可見矣然則先

王作樂以十有二律為之數度唯黃鍾林鍾太簇三管各得全寸而自餘有微分之數者實本三分損益自然所致固非尋常毫忽所能度量者也然則十二律相生至中呂則數將幾終如復用之則中呂更上生黃鍾樂府謂之兩上聲理固然矣

律呂相生下

夫乾天下之至健而六陽宗焉夫坤天下之至順而六陰宗焉然獨陰不生獨陽不生氣必有合然後生故以

乾坤六爻為相生之配黃鍾建子之氣則乾之初九而於卦為復下生林鍾則坤之初六而於卦為始是謂律娶妻一也黃鍾陽九林鍾陰六以九生六明陽唱陰和之義林鍾建未之氣上生太簇則乾之九二而於卦為臨是謂呂生子一也太簇建寅之氣下生南呂則坤之六二而於卦為遯是謂律娶妻二也南呂建酉之氣上生姑洗則乾之九三而於卦為泰是謂呂生子二也姑洗建辰之氣下生應鍾則坤之六三而於卦為否是謂

律娶妻三也應鍾建亥之氣上生蕤賓則乾之九四而於卦為大壯是謂呂生子三也蕤賓建午之氣上生大呂則坤之六四而於卦為觀是謂律娶妻四也大呂建丑之氣下生夷則則乾之九五而於卦為夬是謂呂生子四也夷則建申之氣上生夾鍾則坤之六五而於卦為剝是謂律娶妻五也夾鍾建卯之氣下生無射則乾之上九而於卦為乾是謂呂生子五也無射建戌之氣上生仲呂則坤之上六而於卦為坤是謂律娶妻六也

由是觀之十二律損益之數不出於三以象三才生娶
之法不出於八以象八風同位者象夫婦異位者象子
母上生六而倍之下生六而損之皆以九為法故黃鍾
九寸其數八十一數官林鍾六寸其數五十四數徵太簇八
寸其數七十二數商南呂之數四十八數羽姑洗之數六十
四數角應鍾之數四十二蕤賓之數五十七大呂之數七
十六夷則之數五十一夾鍾之數六十七無射之數四
十五仲呂之數六十可得而類推矣

崔靈恩三禮義宗
曰同位者象夫婦

異位者象子母黃鍾下生林鍾同在初位故為夫婦林鍾上生九二太簇故為子母太簇下生六二南呂又為夫婦餘皆准此

律呂子聲

先儒之論律呂正聲倍子而為母子聲半正而為子若黃鍾之管正聲九寸為均其子聲則四寸半三分損一下生林鍾之子又三分益一上生太簇之子由是第之終於中呂以從十二母相生之法故黃鍾為宮而下生林鍾為徵林鍾上生太簇為商太簇下生南呂為羽南

呂上生姑洗為角此黃鍾之調皆得三分之次故用正律之聲大呂為宮而下生夷則為徵夷則上生夾鍾為商夾鍾下生無射為羽無射上生中呂為角此大呂之調皆得三分之次故用正律之聲太簇為宮而下生南呂為徵南呂上生姑洗為商姑洗下生應鍾為羽應鍾上生蕤賓為角此太簇之調皆得三分之次故用正律之聲夾鍾為宮而下生無射為徵無射上生中呂為商中呂上生黃鍾為羽黃鍾正律聲長非中呂三分去一

之次故用子聲為羽黃鍾下生林鍾為角林鍾子律聲
短非中呂為商之次故還用正聲為角此夾鍾之調正
聲四子聲一也姑洗為宮而下生應鍾為徵應鍾上生
蕤賓為商蕤賓上生大呂為羽大呂正律聲非蕤賓三
分去一之次故用子聲為羽大呂下生夷則為角夷則
子律聲短非蕤賓為商之次故還用正聲為角此姑洗
之調正聲四子聲一也中呂為宮而上生黃鍾為徵黃
鍾正律聲長非中呂三分去一之次故用子聲為徵黃

鍾下生林鍾為商林鍾子律聲短非中呂為宮之次故
還用正聲為商林鍾上生太簇為羽太簇正律聲長非
林鍾三分去一之次故用子聲為羽太簇下生南呂為
角此中呂之調正聲三子聲二也蕤賓為宮而上生大
呂為徵大呂正律聲長非蕤賓三分去一之次故用子
聲為徵大呂下生夷則為商夷則上生夾鍾為羽夾鍾
正律聲長非夷則三分去一之次故用子聲為羽夾鍾
上生無射為角無射子律聲短非夷則為商之次故還

用正聲為角此蕤賓之調正聲三子聲二也林鍾為宮而上生太簇為徵太簇正律聲長非林鍾三分去一之次故用子聲為徵太簇下生南呂為商南呂上生姑洗為羽姑洗正律聲長非南呂三分去一之次故用子聲為羽姑洗下生應鍾為角應鍾子律聲長非南呂為商之次故還用正聲為角此林鍾之調正聲三子聲三也夷則為宮而上生夾鍾為徵夾鍾正律聲長非夷則三分去一之次故用子聲為徵夾鍾下生無射為商無射

子律聲短非夷則為宮之次故還用正聲為商無射上
生中呂為羽中呂正律聲長非無射三分去一之次故
用子聲為羽中呂上生黃鍾為角黃鍾正律聲長非無
射為商之次故用子聲為角此夷則之調正聲二子聲
三也南呂為宮南呂上生姑洗為徵姑洗正律聲長非
南呂三分去一之次故用子聲為徵姑洗下生應鍾為
商應鍾子律聲短非南呂為宮之次故用正聲為商應
鍾上生蕤賓為羽蕤賓正律聲長非應鍾三分去一之

次故用子聲為羽蕤賓上生大呂為角大呂正律聲長
非應鍾為商之次故用子聲為角此南呂之調正聲二
子聲三也無射為宮而上生中呂為徵中呂正律聲長
非無射三分去一之次故用子聲為徵中呂上生黃鍾
為商黃鍾正律聲長非無射為宮之次故用子聲為商
黃鍾下生林鍾為羽林鍾正律聲長非黃鍾子聲三分
去一之次故用子聲為羽林鍾上生太簇為角太簇正
律聲長非黃鍾子聲為商之次故用子聲為角此無射

之調正聲一子聲四也應鍾為宮應鍾上生蕤賓正律
聲長非應鍾三分去一之次故用子聲為徵蕤賓上生
大呂為商大呂正律聲長非應鍾為宮之次故用子聲
為商大呂下生夷則為羽夷則正律聲長非蕤賓子聲
為徵之次故用子聲為羽夷則上生夾鍾為角夾鍾正
律聲長非大呂子聲為商之次故用子聲為角此應鍾
之調正聲一子聲四也凡此蔽於十二律均旋為宮之
說失周禮三宮之意也三宮旋相而唱和有應曷嘗有

子聲耶若以為十二律皆有子聲然則黃鍾大呂太簇
三律何獨止用正聲耶

辨四清

先王制十有二律倡和清濁迭相為經而清濁之聲未
嘗偏勝也孰謂十二律之外復有四清聲乎為是說者
非古也其隋唐諸儒傳會之說歟彼其所據者唐之正
史通禮會要令式通典義纂義羅之類特一人之私說
非有本於聖人之經天下之公論也世之廣其說者不

過謂臣民相避以為尊卑也鍾磬之簋以無射為宮則黃鍾為商太簇為角無射君也管長四寸九分黃鍾臣也乃長九寸太簇民也亦長八寸若用正聲則民與臣聲皆尊而君聲獨卑必須用黃鍾四寸五可太簇四寸之清以荅無射之律則君尊於上臣卑於下民役其令矣是不知十二律以黃鍾為君非所以為臣也今夫黃鍾之律冠十二律之首正位於北而面南所以寓人君向明而治之意而十有一律莫敢與之抗矣是君聲常

尊而臣民之聲常卑天地自然之道也安有君臣與民相避以為尊卑之理乎彼謂黃鍾至夾鍾四清聲以附正聲之次原其四者之意蓋為夷則至應鍾四宮而設既謂黃鍾至夾鍾為之又謂為夷則至應鍾而設是兩四清也至於論琴瑟笙竽又益四清而為十二清聲是十六律之說果不足以勝十二月矣又況既有黃鍾矣又有黃鍾清焉豈古人所謂尊無二上之旨哉臣竊觀聖朝嘗命有司考正鍾律遍問大樂諸上僉言每朝饗

祭祀唯傳舊法用正聲十二其四清聲多不能考擊是
太常之樂名用四清實用十二律也李照據周禮典同
而論之謂十二鍾之外其餘四鍾皆是清聲非中聲乃
鄭衛之樂也若去四清之鍾則哀思邪辟之聲無由而
起何知樂之深耶奈何好異之士排而非之真墨子之
徒也

樂書卷一百一

欽定四庫全書

樂書卷一百二

宋 陳暘 撰

樂圖論

十二律

律呂合陰陽聲

律呂辨天地四方聲

律呂候氣之法

律呂應氣之節

律呂合陰陽聲

六陽律

黃鍾

太簇

姑洗

蕤賓

夷則

無射

六陰律

大呂

應鍾

南呂

函鍾

小呂

夾鍾


周官大師掌六律六同以合陰陽之聲黃鍾太簇姑洗
蕤賓夷則無射陽聲也大呂應鍾南呂函鍾小呂夾鍾
陰聲也蓋日月會於十二次而右轉聖人制六同以象
之斗柄運於十二辰而左旋聖人制六律以象之六律
陽也左旋以合陰六同陰也右轉以合陽故大司樂祀
天神則奏黃鍾歌大呂以合之祭地祇則奏太簇歌應
鍾以合之祀四望則奏姑洗歌南呂以合之祭山川則
奏蕤賓歌函鍾以合之享先妣則奏夷則歌小呂以合

之享先祖則奏無射歌夾鍾以合之聖人以律同合陰陽之聲為未足也又文之以五聲而使聲待是而和播之以八音使音待是而諧然則律同有不為聲音之橐籥歟國語曰黃鍾所以宣養六氣九德也太族所以金奏贊揚出滯也姑洗所以修潔百物考神納賓也蕤賓所以安靖神人獻酬交酢也夷則所以詠歌九則平民無二也無射所以宣布哲人令德示民軌儀也大呂助宣氣也夾鍾出四隙之細也仲呂宣中氣也林鍾和展

百事俾莫不任肅純恪也南呂贊陽秀也應鍾均利器
用俾應復也律呂不易無姦事也概見於此唐之祭社
下奏太簇上歌黃鍾太簇陽也位於寅應鍾陰也位於
亥故斗建亥則日月會於寅斗建寅則日月會於亥是
知聖人之制取合陰陽而歌奏之儀用符交會唐之祭
社歌奏俱用陽聲非周人分樂之意也趙慎言請改黃
鍾為應鍾均可謂知合陰陽之聲者矣古者作律皆文
之以五聲則一律而具五聲先王之制也後世一律而

具七聲十二律而具八十四調其失自京房始可不正之乎

律呂辨天地四方聲




陽六為律呂黃鍾至無射陽聲也陰六為同自大呂至應鍾陰聲也陽聲左旋始於子終於巳陰聲右轉始於丑終於卯而天地四方陰陽之聲具焉蓋乾位西北氣覆為天衆陽之主也坤位東南形載為地衆陰之主也然天雖為衆陽之主而有陰焉故曰立天之道曰陰與陽此天所以有陰陽之聲也地雖為衆陰之主而有陽焉故曰立地之道曰柔與剛此地所以有陰陽之聲也麗乎乾者為震為坎麗乎坤者為離為兌震坎陽卦也

然而多陰離兌陰卦也然而多陽語其位則正四方之卦焉此四方所以各有陰陽之聲也天地四方陰陽之聲出於自然者也六律六同陰陽之聲出於人為者也即人為之聲辨自然之聲以為樂器此揚子所謂作者貴其有循而體自然者也道生一則奇而為陽一生二則耦而為陰二生三則陰陽參和為冲氣三生萬物而樂器取具焉是雜比十有二聲而和之取中聲以為樂器之意也易曰制器者尚象記曰聲樂之象也即十有

二聲以為樂器得不為制器尚象者乎典同所掌者器也大師所掌者聲也器異聲故言掌六律六同之和以辨天地四方陰陽之聲聲則各有所合故言掌六律六同以合陰陽之聲

律呂候氣之法



陰陽之氣渾為太極發為五聲分為十二律蓋所以紀
斗氣効物類也天効以景地効以響陰陽和則景至律
氣應則灰飛自然之符也先王為是候氣之法造室三
重各啓門塗必固密為門之位外之以子中之以午內
復以子揚子所謂九閉之中也蓋布緹縵室中上圓下
方依辰位埋律管使其端與地齊而以薄紗覆之迨中
秋白露降採河內葭莖為灰加之管端案律而候之氣
至者灰去為氣所動者灰散為物所動者灰聚此冬夏


二至陰陽氣興古人未嘗不候之以定歷均樂也昔北
齊信都芳能以管候氣嘗與人語指天曰孟春之氣至
矣往驗管而灰飛又為輪扇二十四埋之地中測二十
四氣每一氣感則一扇自動他扇自若與管灰相應然
氣應有蚤晚灰飛有多寡又不可不知也後漢冬夏至
日天子御前殿陳八音均度量候鍾律冬至陽氣應則
黃鍾通土灰輕而衡仰夏至陰氣應則蕤賓通土灰重
而衡俯亦候氣之一端也隋開皇中準古法以候節氣

而氣應或先或後文帝怪而問之先洪對曰灰飛半出為和氣全出為猛不能出為衷和氣應者其政平猛氣應者其君暴可謂善譎諫矣

尚書中候云鍊丑為律候之月令疏云以銅為之李

淳風云自古言樂聲律呂者皆本於十二管以氣應灰飛為驗後魏末孫僧化造六甲一周歷其序云以管律候某月某時律氣應推校前後五六事皆不與算厯家術數相符

律呂應氣之節



斗居天之中運玉衡以冒覆四方死生萬物者也以黃
鍾月王加十五度為一節二節為一氣二氣為一風二
風為一時四時為一歲故斗柄指子則冬至音比黃鍾
加旬有五曰指癸則小寒音比應鍾加旬有五曰指丑
則大寒音比無射加旬有五曰指報德之維則越陰在
地故曰冬至四十六日而立春音比南呂加旬有五曰
指寅則雨水音比夷則加旬有五曰指甲則驚蟄音比
林鍾加旬有五曰指卯中繩故曰春分則雷行音比蕤

賓加旬有五日指乙則清明風至音比仲呂加旬有五
日指辰則穀雨音比姑洗加旬有五日指常羊之維則
春分盡故曰有四十六日而立夏音比夾鍾加旬有五
日指巳則小滿音比太簇加旬有五日指丙則芒種音
比大呂加旬有五日指未則大暑音比太簇加旬有五
日指背陽之維則夏至盡故曰有四十六日而立秋音
比夾鍾加旬有五日指申則處暑音比姑洗加旬有五
日指庚則白露降音比仲呂加旬有五日指酉中繩故

曰秋分雷戒蟄蟲北鄉音比蕤賓加旬有五
日指辛則寒露音比林鍾加旬有五
日指戌則霜降音比夷則加旬有五
日指蹠通之維則秋分盡故曰有四十六日而
立冬音比南呂加旬有五
日指亥則小雪音比無射加旬有五
日指壬則大雪音比應鍾自此以往窮則變終
則始天之通也故黃鍾之月天地氣閑土事毋作大呂
之月歲旦更始農民是息太簇之月草木繁動土功以
興夾鍾之月羣生發榮布德蠲刑姑洗之月嘉氣趣至

溝涂脩利中呂之月百穀滋茂毋妨農務糴賓之月陽

氣在上安壯養佼

後小也

林鍾之月毋廢大事以將陽氣

夷則之月修法飭刑選士勵兵南呂之月蟄蟲入戶趨

農收聚無射之月閉藏為冬審民所終后以裁成天地

之道輔相萬物之宜也劉昭曰春宮秋律百卉必凋秋

宮春律萬物必榮夏宮冬律雨電必降冬宮夏律雷必

發聲亦信有之矣

凡一律之法具三十日一風之法具四十五日八風十二律各具三百六

十之數

樂書卷一百二

欽定四庫全書

樂書卷一百三

宋 陳暘 撰

樂圖論

十二律

律呂數度

律呂齊量

律呂圍徑

律呂清濁

律呂數度

凡物以三成聲以五立以三參五而八數成矣人以八尺為
尋物以八竅卵生故凡十有二律之音皆隔八而生焉道生
一一生二二生三故日三而成朏月三而成時歲三而成閏
祭以三飯為禮喪以三踊為節兵重三軍之制國重三卿之
治以三參物而九數成矣故十有二律之寸而黃鍾稱是焉
蓋天之中數五地之中數六五六相合而生黃鍾黃鍾子之
氣也十一月建焉而辰在星紀大呂丑之氣也十二月建焉
而辰在玄枵太族寅之氣也正月建焉而辰在陬訾夾鍾卯

之氣也二月建焉而辰在降婁姑洗辰之氣也三月建焉而辰在大梁中呂巳之氣也四月建焉而辰在實沈蕤賓午之氣也五月建焉而辰在鶉首林鍾未之氣也六月建焉而辰在鶉火夷則申之氣也七月建焉而辰在鶉尾南呂酉之氣也八月建焉而辰在壽星無射戌之氣也九月建焉而辰在大火應鍾亥之氣也十月建焉而辰在析木是先王因天地陰陽之氣而辨十有二辰即十有二辰而生十有二律其長短有度其多寡有數而天下之

度數出焉要之皆黃鍾以本之也傳曰律所以立均出
度揚雄曰泠竹為管室灰為候以揆百度百度既設濟
民不誤然則先王作樂稽之度數至於百度得數而有
常者豈不原於十二律耶說者以百刻為百度何其誤
也大司樂以六律六同五聲八音六舞大合樂凡六樂
皆文之以五聲播之以八音大師掌六律六同以合陰
陽之聲皆文之以五聲宮商角徵羽皆播之以八音金
石土革絲木匏竹以是求之五色成文而不亂文之以

五聲之和也八風從律而不姦播之以八音之諧也百度得數而有常節之以十二律之度也吳季扎觀樂於魯而曰五聲和八風平節有度守有序盛德之所同也五色成文而不亂五聲和之謂也八風從律而不姦八風平之謂也百度得數而有常節有度守有序之謂也昔人常謂顓帝始作樂風承雲之樂以効八風之音舜以夔為樂正正六律和五聲以通八風而天下服此之謂歟然古人之制聲律蓋皆有循而體自然不可得而

損益者也何則五聲在天為五星在地為五行在人為
五常五聲可益為七音然則五星五行五常亦可得而
益之乎十二律所以應十二月中氣者也如可益而為
六十然則十二月亦可得而益之乎劉焯以京房為妄
田琦以何妥為當可謂知理矣

律呂齊量

形而上者謂之道形而下者謂之器先王作樂以形而
上者之道寓形而下者之器雖非數度不離於數度其

為數度也即十有二律而已雖非齊量不離於齊量其
為齊量也即十有二聲而已蓋數本起於黃鍾始於一
而三之歷十二辰而五聲備其長則度之所起而其餘
律皆自是生焉故凡為樂器以十有二律為之數度硯
聲生於高肆聲生於下甄聲生於薄石聲生於厚高下
薄厚之屬所制則有齊矣贏聲生於達衍聲生於回衍
聲生於侈鬱聲生於弇達回侈弇之屬所容則有量矣
故凡為樂器以十有二聲為之齊量一要宿中聲而已

由是觀之即十有二律數度十有二聲齊量雜比而和之取中聲焉以為樂器豈不信哉國語曰古者神瞽考中聲而量之以制度律均鍾蓋以此歟周景王將鑄無射而為之大林單穆公非之為是故也然言十有二律則知聲之為鍾言十有二聲則知律之為管不言十有二鍾而言聲者蓋鍾於八音為金金於五行為言秋言之時聲所自出此所以言聲以見之歟雖然非特為樂器如此凡以鍾律和樂亦如之書所謂律和聲是也

律呂圍徑

古者採嶰谷之竹斷兩節間而吹之雄鳴者為黃鍾之律雌鳴者為林鍾之呂而圓徑圍分之數固已素具乎其中矣蓋黃鍾之律長九寸累黍積之徑三分圍九分蓋本於天物生出自然非絲輕重之數也班固以黃鍾三九之法起十二律周徑三分參天之數也圍九分終天之數也司馬彪鄭康成並用徑三圍九之說孟康推而行之謂林鍾長六寸圍六分太簇長八寸圍八分後


魏安豐王宗康成之說作林鍾太簇二律而吹之不合
黃鍾商徵之聲後更圍皆九分始與均鍾器合是知孟
康之說謬於諸儒矣十二律之寸既因損益而有長短
則其容受黍數亦稱之而已不嫌乎同於徑三圍九也
周公之制九數圓周率三圓徑率一指凡天下之數言
之非專論十二律周徑也今之論律者區區以是說為
言不亦迂乎

律呂清濁

樂莫不有音音莫不有適而衷也者適而已矣然太清則志危以危聽清則耳谿極谿極則不鑒不鑒則竭矣太濁則志下以下聽濁則耳不收不收則不搏不搏則怒矣皆非所以為適也一清一濁所常無窮一要宿清濁之衷而已安往而不適哉記曰五色成文而不亂八風從律而不姦百度得數而有常小大相成終始相生倡和清濁迭相為經傳曰黃帝察發歛定清濁莊周述黃帝張咸池之樂於洞庭之野而曰一清一濁文武經

絃由此觀之先王作樂主之以十二律文之以五聲播之以八音其體則小大相成其用則終始相生一倡一和一清一濁流行散徙不主常聲迭相為經而已孰謂蕤賓至應鍾為清黃鍾至中呂為濁哉今夫樂聲之於衆音輕高為清重大為濁然律之增損長短不常聲之抑揚清濁不一增則轉濁減則愈清清濁雖殊而本音不失安有定長定短配屬高下者耶至如黃鍾九寸聲之最濁者也中減則聲清應鍾四寸有奇聲之最清者

也倍增則聲濁一律如此餘管可知鄭康成之說吾無
取焉耳漢武帝採五經諸子呂覽張蒼之說以正清濁
置協律都尉以司之可謂有志於古矣



樂書卷一百三

欽定四庫全書

經部

樂書卷一百四至
十三

纂修官周學士管鑒部臣鄭葵等

侍讀臣孫球覆勘

總校官檢討臣

何思鈞

校對官修撰臣吳錫齡

謄錄監生臣施華

欽定四庫全書

樂書卷一百四

宋陳旴撰

樂圖論

原闕

原本上
闕三字
軍聲

原本上
闕三字
六詩

八音從八風

律呂大合樂

闕

關 呂聽軍聲

以下原本每
行上闕七字

勝之道外有佐勝之術周官大師執
詔吉凶以佐勝之術行必勝之道故
勝而士強聽宮聲知軍和而士附其
角聲知軍擾而心喪聽徵聲知將急
兵弱而威奪其凶可得而詔也古之
知勝負不待戰而決不過如此易曰
傳曰望敵知吉凶聞聲効勝負豈不

聽軍聲主師出言之所以存預戒
有功左執律愷樂獻於社主師旋
仁也然周之出師有太史抱天時
律詔吉凶則先王慎戎事重民命
以軍禮同邦國大師之禮用衆居
大師始執同律聽軍聲而詔吉凶
於此又非大師所與也

關
教六詩

以下原本每
行上闕八字

六同以合陰陽之聲教六詩曰風
曰頌以六德為之本以六律為之
首六律以黃鍾為本則六詩本之
六德制之禮義中聲之所本也六
所寓也大師教中聲所止之詩以
為之音則所道者中德所詠者中
和之紀耶大司樂之於律同則以
陰陽之聲而已大司樂之於國子

大師則教六詩而已是尊者其治
以略不可不知也

欽定四庫全書

卷一百四

八音從風



至治之世天地之氣合以生風日至則月鍾其風以生
十有二律故揚雄曰剛割匏竹革木土金擊石彈絲以
和天下攄擬之八風左氏論八音曰以遂八風論舞曰
節八音而行八風由此推之八風象八卦者也其所以
擬而遂之者八音節而行之者八佾之舞而已蓋主朔
易者坎也故其音革其風廣莫為果蓏者艮也故其音
匏其風融震為竹故其音竹其風明庶巽為木故其音
木其風清明兌為金故其音金其風闐闐乾為玉故其

音石其風不周瓦土器也故坤音土而風涼蠶火精也
故離音絲而風景是正北之風從黃鍾之律而黃鍾冬
至之氣也東北之風從大呂太簇之律而大呂太簇大
寒啓蟄之氣也正東之風從夾鍾之律而夾鍾春分之
氣也東南之風從姑洗仲呂之律而姑洗仲呂穀雨小
滿之氣也正南之風從蕤賓之律而蕤賓夏至之氣也
西南之風從林鍾夷則之律而林鍾夷則大暑處暑之
氣也正西之風從南呂之律而南呂秋分之氣也西北

之風從無射應鍾之律而無射應鍾霜降小雪之氣也
豈非傳所謂樂生於風之謂乎八方之風周於十二律
如此則順氣應之和樂興而正聲格矣尚何姦聲之有
耶樂記曰八風從律而不姦國語曰律呂不易無姦事
也如此而已五音有變宮變徵之數琴絃有少宮少商
之調皆非先王制樂度數之常也抑其為變者歟

律呂大合樂

陰陽之理聲自倍而為日律自倍而為辰是聲本於日

而以情質律本於辰而以和聲聲律相協而八音生焉
故先王作樂以六律六同而考五聲以五聲而成八音
以八音而節六舞以六舞而大合樂則六代之樂凡發
諸聲音形諸動靜而三才之道備矣故用之天地足以
降神而用之宗廟足以格祖考用之大朝會足以和邦
國用之教萬民足以諧萬民用之大饗食足以安賓客
用之待夷狄足以說遠人用之大蜡足以作動物然則
周家大合六代之樂所施如此其廣有聲之頌特其始

作備樂合乎祖者而已王子頽之饗王徧及六舞春秋
譏之者為其非天子而作備樂故也由此觀之先王六
代之樂未始不具十二律至於分樂而序之舞雲門則
奏黃鍾歌大呂舞咸池則奏太簇歌應鍾舞大磬則奏
姑洗歌南呂舞大夏則奏蕤賓歌函鍾舞大濩則奏夷
則歌小呂舞大武則奏無射歌夾鍾者特其所主異爾
然則六樂皆文之以五聲播之以八音惡有不並用十
二律之理哉文王世子曰凡釋奠者必有合也有國故

則否凡大合樂必遂養老蓋釋奠者禮也必有合者樂也凡釋奠必有合者主行禮以合樂也凡大合樂必遂養老者主合樂以行禮也然此商禮爾周禮則不施於釋奠矣古人重釋奠之禮如此後世則有歌而無舞設堂上之縣去堂下之肆則八音不備舞蹈不式果何以為樂哉

樂書卷一百四

欽定四庫全書

樂書卷一百五

宋 陳暘 撰

樂圖論

雅部

五聲

五聲上

五聲中

五聲下

三宮無商

五聲上



夫物生而有情情發而為聲故天五與地十合而生土於中其聲為宮地四與天九合而生金於西其聲為商天三與地八合而生木於東其聲為角地二與天七合而生火於南其聲為徵天一與地六合而生水於北其聲為羽蓋五聲本於五行布於五位其數起於黃鍾九寸之管因九而九之則凡管周徑之數八十有一者宮聲之數也因宮數三分去一下而生徵則五十有四者徵聲之數也因徵數三分益一上而生商則七十有二

者商聲之數也因商數三分去一下而生羽則四十有
八者羽聲之數也因羽數三分益一上而生角則六十
有四者角聲之數也數多者濁以大而大不踰宮數小
者清以細而細不踰羽則羽徵之聲清於角而角聲又
清於商矣凡此五聲之常百王不易之制也今夫宮生
徵徵生商商生羽羽生角故彈宮而徵應彈徵而商應
彈商而羽應彈羽而角應是五聲以相生為和相勝為
繆先王立樂之方也司馬遷推五音相生而以宮生角

角生商生徵生羽生宮非通論也雖然先王作樂以象或亦未嘗不推之以應天以謂天氣不和不能生物樂聲不和不能感人是生物者五氣之正而感人者五聲之正也然人受天地之中以生氣莫不鍾五行之秀性莫不全五常之正其化之也亦豈難哉不過以五聲之和達五常之性而已故聞宮聲斯達誠實之心而為信聞徵聲斯達恭敬之心而為禮聞商聲斯達羞惡之心而為義聞羽聲斯達是非之心而為智聞角聲

斯達惻隱之心而為仁夫如是則樂行而倫清外則耳目聰明內則血氣和平移風易俗天下皆寧矣仲尼有云移風易俗莫善於樂其在茲乎

絲隨五聲管隨十二律然和平沉厚麓大

而下者宮聲也勁凝明達從上而下歸於中者商聲也圓長通徹中平而王者角聲也抑揚流利從下而上歸於中正者徵聲也嚶嚶而遠微細小而高者羽聲也

五聲中

五聲之於樂近取諸身以盡性遠取諸物以窮理故聲出於脾合口而通之謂之宮出於肺開口而吐之謂之

商出於肝而張齒湧吻謂之角出於心而齒合吻開謂之徵出於腎而齒開吻聚謂之羽凡此近取諸身以盡性者也宮土聲也其性圓而居中若牛之鳴窳而主合商金聲也其性方而成器若羊之離羣而主張角木聲也其性直而崇高若雉之鳴木而主湧徵火聲也其性明而辨物若豕之負駭而主分羽水聲也其性潤而澤物若馬之鳴野而主吐凡此遠取諸物以窮理者也蓋樂始於聲聲始於宮通之而為商觸之而為角驗之而

為徵翕張之而為羽宮無為以覆物君之象也商有為以通物臣之象也角善觸而難馭民之象也徵出無而驗有事之象也羽因時而翕張物之象也宮為君足以御臣商為臣足以治民角為民足以興事徵為事足以成物羽為物足以致用此其序也傳曰聞宮音使人溫舒而廣大聞商音使人方正而好義聞角音使人惻隱而愛人聞徵音使人樂善而好施聞羽音使人整齊而好禮宮亂而君驕失溫舒廣大之意也商亂而官壞失

方正好義之意也角亂而民怨失惻隱愛人之意也徵
亂而事勤失好施而為之之意也羽亂而財匱失好禮
而節之之意也先儒謂宮聲方正而好義角聲堅齊而
好禮誤矣晏子以徵招角招為景公作君臣相悅之樂
雖主興發以為事補不足以為民亦舉中見上下之音
歟宮徵商羽角上下相生之序也宮商角徵羽君臣民
事物之序也宮聲雄洪調則政和國安亂則其國危在
西域則婆陀力也商聲鏘鏘倉倉然調則
刑法不作威令行亂則其官壞在西域則稽積識也角
聲喔喔確確然調則四民安亂則其人怨在西域則沙

識也徵聲倚倚戲然調則百物理亂則庶績隳在西域則沙臘也羽聲詠雨酣具然調則倉廩實庶物備亂則其民憂其財匱在西域則般膽也

五聲下

宮生於黃鍾九寸其聲重而尊商生於太簇八寸其聲明而敏角生於姑洗七寸其聲經而易制徵生於林鍾六寸其聲泛而不流羽生於南呂五寸其聲渙散而抑故爾雅釋樂宮謂之重商謂之敏角謂之經徵謂之迭羽謂之柳其聲音清濁度數多寡雖有所不同其因而

九之未嘗不一也然則舜作五絃之琴而有徵招角招之別則宮商羽之招可類見矣是五聲之於樂損之則虧益之則贍豈足以紀中聲成雅樂哉古人嘗謂中和莫盛乎五故五之數在易為中又在禮為中庸在樂則主中聲而已引而足之觸類而長之其名則宮商角徵羽其用則重敏經迭抑其象則君臣民事物其位則左右上下中其色則青黃赤白黑其性則仁義禮智信其情則喜怒哀悲憂恐其事則貌言視聽思在天運而為五

樂在地列而為五行在人竅而為五臟則中聲所止無
往不在要之必以宮為主故傳曰宮者音之主也又曰
宮為四聲綱故商非宮則失其所守不足以為臣角非
宮則失其所治不足以為民徵非宮則失其所為不足
以為事羽非宮則失其所生不足以為物況旋相之樂
非宮何以降神哉噫道生一則奇而為陽一生二則偶
而為陰二生三則陰陽中而為冲氣以五聲求之陽中
為角陰中為商陽正為徵陰正為羽參合陰陽而為冲

氣者其宮乎由是觀之陰陽相應則和偏勝則乖而樂聲如之苟捨五聲之正而益之以二變其欲無偏勝之患難矣五聲一也或謂五音或謂五色或謂五樂者蓋見於節奏為五聲著於文采為五色變而成方為五音比音而樂為五樂其實一也

三宮無商

生於天三成於地八者木之所以為行也角聲出焉生於地四成於地九者金之所以為行也商聲出焉金則

剋木木則剋於金未有並用而不相害者也周以木德
王天下而為當時之貴商以金德王天下而為已用之
賤周官旋宮之樂禮天神則圜鍾為宮黃鍾為角太簇
為徵姑洗為羽禮地示則函鍾為宮太簇為角姑洗為
徵南呂為羽禮人鬼則黃鍾為宮大呂為角太簇為徵
應鍾為羽而未嘗及商者避其所剋而已大師掌六律
六同以合陰陽之聲皆文之以五聲宮商角徵羽則周
之作樂非不備五聲其不言商者文去而實不去也與

春秋齊晉實子而實不予同義荀卿以審詩商為大師之識則聲詩之有商聲太師必審之者避所剋故也鄭康成謂祭尚柔而商堅剛故不用焉楊收曰周祭天地不用商及二少以商聲剛而二少聲下所以取其正而裁其繁也若然周之佩玉左徵角右宮羽亦曷為不用商耶聖朝祫享之樂奏懷安九成之曲黃鍾為宮三奏大呂為角二奏太簇為徵二奏應鍾為羽二奏是不知去商者周人之制而已以周人之制推之則聖朝以火德

王天下論避其所剋當去羽音矣今太常用樂不審詩
羽而審詩商蓋失古人之旨遠矣樂安得而和哉

樂書卷一百五

欽定四庫全書

樂書卷一百六

宋陳旸撰

樂圖論

雅部


八音

八音上

八音中

八音下

聲音通論



八音上

樂出於虛而寓於實出於虛則八音同冥於道寓於實則八音各麗於器器具而天地萬物之聲可得而考矣故萬物盈於天地之間若堅若脆若勁若韌若實若虛若沉若浮皆得効其響焉故八物各音而同和也自少皞氏効八風之調而八音固已大備後世雖有作者皆不能易茲八物矣金聲春容秋分之音也莫尚於鍾石聲溫潤立冬之音也莫尚於磬絲聲纖微夏至之音也

莫尚於琴瑟竹聲清越春分之音也莫尚於管籥匏聲
崇聚立春之音也笙竽繫焉土聲孟秋之音也塤
缶繫焉革聲隆大冬至之音也鼗鼓繫焉木聲無餘立
夏之音也祝敔繫焉然金失之重石失之輕絲失之細
竹失之高匏失之長土失之下革失之洪木失之短要
皆不相奪倫然後克諧而無失也經論八音多矣原始
言之不過曰施之金石要終言之不過曰匏竹在下兼
始中終言之則曰金石絲竹樂之器也乃若論其詳宜

莫若周官大師焉蓋樂器重者從細而細不踰羽輕者從大而大不踰宮適細大之中而無踰者其惟角乎蓋莫重於金故尚羽莫輕於瓦絲故尚宮輕於金重於瓦絲者石也故尚角匏竹非有細大之從也故尚議革木非有清濁之變也故一聲然金石土類西凝之方也故與土同位於西匏竹木類東生之方也故與木同位於東絲成於夏故琴瑟在南革成於冬故鼗鼔在北大師之序八音以金石土為先革絲次之木匏竹為後者蓋

西者秋言之時聲之方也虛者樂所自出聲之本也故音始於西成於東於西則金石先於土者以音逆推其所始故也於東則匏竹後於木者以陽順序其所生故也革絲居南北之正先革後絲者豈亦先虛之意歟樂記言樂之器荀御言所以道德者以德待器而後達故也

八音中

八音之於樂象為八卦位為八方氣為八風中為八極

其數一本中和之五冲氣之三以導中聲而已古者上
農赫土出金以為鍾上工磨石出玉以為磬鍾於五行
為金於五事為言於五藏為氣於五性為義金則奏為
鏗鎗言則發為號令直其氣所以立橫方其義所以立
武此聽其聲所以思武臣也磬於八音為石於八卦為
乾石則其形曲折而有別乾則其行剛健而不陷有別
所以立辨不陷所以致死此聽其聲所以思死封疆之
臣也琴瑟同出於絲而靜好其聲則嘒殺而哀潔靜而

廉依義以立志而已此聽其聲所以思志義之臣也竽
笙簫管同出於竹而發猛其聲則動濁而濫合比而會
有聚衆之義焉此聽其聲所以思畜聚之臣也鼓為樂
之君而鼙則卑者所鼓其為革聲一也士譁而譙羣趨
而動有進衆之義焉此聽其聲所以思將帥之臣也由
是觀之君子之於音聽之在心不在耳彼其音之所發
亦誠有所合之也豈在悅鄭衛鏗鎗而已哉玄而發之
言鐘鼓鼙之聲則知絲為琴瑟竹為竽笙簫管也言絲

聲竹則知鐘為金鼓聲為革也言石聲磬則金聲鍾之類見矣言竹聲濫則石聲清之類見矣匏竹利制言竹則匏在其中矣革木聲言革則木在其中矣就八者單出言之故謂之聲曲聽其雜比言之故謂之音八音不言土者以七音待土贊之而後和故也鄭康成以石聲磬當為磬字之誤豈經旨哉於傳有之金聲鏗鏗以立橫橫以勁武金聲正則人思武矣石聲硤硤以立別別以致死石聲正則人思死節矣絲聲哀哀以立廉廉以

立志絲音正則人將立操矣竹音濫濫以立會會以聚
衆竹音正則人思和洽矣土音濁濁以立太太以含育
土音正則人思寬厚矣革音謹謹以進衆革音正則人
思毅勇矣匏音啾啾以立清清以忠謹匏音正則人思
恭愛矣木音直直以立正正以寡欲木音正則人思絜
已矣亦足發明於此琴瑟之音言哀鼓鼙之音言謹者
蓋琴瑟夏至之音一陰生之時也鼓鼙冬至之音一陽
生之時也陽主樂以譁陰主哀以靜此其音所以不同

八音下

樂經之亡久矣其遺音餘韻雖奪於殽亂之衆言然質諸他經亦可少概見矣樂記曰聖人作為鞀鼓控揭塤簎此六者德音之音也然後鍾磬竽瑟以和之蓋作革以為鞀鼓作木以為控揭作土以為塤作竹以為簎作金以為鍾作石以為磬作匏以為竽作絲以為瑟則鞀鼓控揭塤簎唱德音於其始也鍾磬竽瑟和德音於其終也書曰戛擊鳴球搏拊琴瑟以詠下管鞀鼓合止杞

敵笙鏞以間蓋鳴球以為石琴瑟以為絲下管以為竹
拊鞀鼓以為革祝敵以為木笙以為匏鏞以為金則夏
擊鳴球搏拊琴瑟作之於堂上也管鞀鼓祝敵笙鏞作
之於堂下也引而伸之觸類而長之周官旋宮之樂舉
鐘以見石舉鞀鼓以見木舉管以見匏舉琴瑟以見瓦
詩之有瞽言應田縣鼓與鞀則革音也言祝圉則木音
也言簫管則竹音也言磬則石音也不言金者以石見
之不言匏者以竹見之蓋八音之於樂一音不備不足

以為樂以用言之未有不比音以體言之未有不比物
故金石以動之絲竹以行之革木以節之匏以宣之瓦
以贊之所道者中德所詠者中聲然後八音克諧不至
於奪倫也然詩書不言土音易於比坎離獨言缶不及
土音者蓋八音以土為主猶五事以思為主也故七音
非土不和土非七音不備詩書舉七音以見土推用以
見體也易舉缶以見七音明體以見用也由是觀之八
音樂之器而樂非器也君子和樂之情以制器工師因

樂之器以考音古之人有鼓琴而流魚為之出聽有鼓瑟而六馬為之仰秣凡類此者固豈八音之器能使之然哉蓋亦冥於非器之器載道而與之俱矣

聲音通論

凡物動而有聲聲變而有音聲不過五非樂之道也樂之象而已音不過八非樂之象也樂之器而已此記樂者所以有聲者樂之象金石絲竹者樂之器之說也易曰天數五地數五然則五聲其天地之道歟傳曰入者

統八卦諧八音舞八佾以終天地之功然則八音其入
之道歟樂通倫理而三才之道具則冲氣以為和彼發
諸聲音所道者孰非中德所詠者孰非中聲哉世之論
樂者謂五聲天音也八音天化也豈不偏乎五經通議
曰聲者物之性也音者聲成文也是五聲八音之於樂
相有以成相無以廢多之為有餘之贅少之為不足之
虧不可得而加損也以五聲配四時言之則角商陰陽
之中也徵羽陰陽之正也中正具而為雅者其在於宮

乎以八音配八卦言之惟乾為天下之至陽而磬之石
音繫焉惟坤為天下之至陰而瓦之土音繫焉竹音震
革音坎匏音艮音雖不同而同於陽無非本乎乾者也
木音巽絲音離金音兌音雖不同而同於陰無非本乎
坤者也是陰陽相應則和偏勝則乖凡樂之聲音或虛
實相成或幽顯相形雖清濁不齊其於為聲均也或雜
比成文或曲折成方雖當愆不一其於為音均也蓋聲
音之發心術形焉性術盡焉故古之作樂莫始於律同

莫備於六樂未有不資五聲以文之八音以播之舜以之在治忽而帝周以之大合樂而王書曰聲依永律和聲八音克諧無相奪倫舜成帝功之效也詩曰穆穆厥聲肅雍和鳴我客戾止永觀厥成周成王功之效也由是觀之先王作樂本之情性以為情稽之度數以為文制之禮義以為節以繩德厚而無過德以象事行而無過事一要宿於剛而不怒柔而不懾陽而不散陰而不密以遂天地冲氣之和而已後世不知出此五聲奪於

二變而聲始不正矣八音以木易匏而音始不諧矣彼
哉彼哉亦豈知先王立樂之方聲音之節責之大師聲
音之用責之鼓人聲音之合責之大胥哉蓋禽獸知聲
而不知音衆庶知音而不知樂今之論樂者曾聲音之
不知欲其幽以致鬼神示明以和邦國內以諧萬民外
以安賓客遠以說遠人微以作動物不亦難乎

樂書卷一百六